

## Telau Basuak

~1~

Bel o adé rajo kayo. Bak ne o kayo nien. Anok ne adé telau. Telau basuak o kemelebiak cu'ik ne. Waktau si bi lai jano kelok anok ne yo, tenotoa Bak ne. Sapei lai gi maju cu'ik.

Bak ne matei, tin̄gea mak ne igai. An-an, matei kulo mak ne. Si yo kemelebiak nien kayo ne. Hok dau. Beyaso cu'ik nano, coa lok kerjo. Jano adé neak dasei ne. Misal ne umai ne libea, cigai cacai. Si jemeua umai. Sudo jemeua umai, bi abis kulo tukua umai. Si jemeua kulo areak umeak ne gi luyen ne. Umeak ne o dau. Sudo o bi cigai kulo penan ne. Umeak ne déwék latok ne jemeua. Pecai kute hok tobo yo.

Telau basuak selawei kute tobo yo nano. Asuak ne gi piset yo tun penyelen. Si yo genyai tema'ok uleak kakok ne. Kakok ne coa lok temotoa.

Tobo yo bi cigai adé hok. Tobo yo melarat alau moi beak im̄o. Waktau melarat moi beak im̄o, jano nem̄in ne beak im̄o: pitat, palau, linḡis. Diyo ba gi adé ngen si igai. Sapei neak beak im̄o, padeak asuak ne, "Jibeak uak ige ite moi beak im̄o yo. Bé adé benatang buas. Jibeak ba menea poñok neak piyo baé," padeak ne. Sudo o si menea poñok neak beak im̄o yo.

Bi an diem beak im̄o. Bi ke'ing kulo dawen puea, minoa serudung ne. Padeak asuak ne, "Cenubo makei dawen lalang kulo. Dawen lalang o beyaso ne padék. Waktau ite gi kayo bel o, anak buak Bak o awit menea atep ke'ung sapai ite ngen dawen lalang," padeak ne awei o. Ijai nenea serudung, atep dawen lalang, jijai serudung ne.

~2~

Adé rajo kuñei tebo lai, moi beburau moi beak im̄o. Waktau rajo o burau keneliak ne adé serudung neak beak im̄o. Do kulo teni'uk ne adé sa'ei tun ngota. Waktau si ngota, rajo o mim̄ang jano kécék tobo yo.

Padeak gi tuai su'ang magea gi asuak ne nano, "Jano kelok nu, Asuak?"

"Lebiak baik kakok madeak kelok dute."

Padeak kakok gi tuai ne, "Kelok ku lok jijai babu rajo. Jano jijai tukang kesok ne, atau tukang tepap ne, jijai," padeak ne. "Asal uku mem̄uk baik, mem̄uk monok, mem̄uk jano baé adé," padeak gi kakok ne gi tuai su'ang.

Sudo o padeak gi nomor duai o. Padeak ne, "Uku temotoa kelok kakok kulo," padeak ne.

"Amen kakok mepuk pinḡan, misal ne, uku semupau umeak. Amen kakok semupau umeak," padeak ne, "uku mepuk pinḡan." Pokok ne jano kerjo kakok uku temulung.

Temotoa jano kelok kakok," padeak gi nomor duai yo.

Ijai o kakok ne gi tuai su'ang o temenai ngen asuak ne gi piset o, "Jano kelok nu, Asuak?" padeak ne.

Asuak ne yo jemawap, "Uku lok ijai ngenyan rajo."

"Ku'ang ajea ko a! Awok kidék! Awok titik lok ijai ngenyan rajo!" padeak kakok ne.

Coa si namen, asuak ne gi piset su'ang yo gi paling ba'es, gi paling pacok ne.

Waktau rajo dong mim̄ang o nano, temi'uk cerito tobo yo, lajau cigai si burau. Si semelidik ne, jano si tun nien, jano tobo yo semat.

Sudo o si mepék taño neak keliling serudung nano, mako si coa limeu teko igai moi penan ke'ung tobo yo. Sudo o rajo bélék moi penan ne igai.


Sudo o teko rajo igei. Si majok tentera ne. Tun telau basuak o senergap ne. Sudo si semergap si mem̄in tun telau yo moi sadei ne. Waktau mem̄in tun telau o, si mem̄in ne ca'o baik-baik. Temanyé ngen baik-baik magea tun telau yo. Waktau si sapei neak umeak rajo o, tun telau basuak senam̄ut tun ngen baik-baik, awei kulo rajo. Kute ne madeak: "Ngen do ipe rajo lok nikeak?"

Sudo o rajo madeak, "Uku lok nikeak ngen saleak su'ang tobo yo, serai ngen ca'o ite, makei peletok, temotoa ca'o Ejang. Makei kejai awei tun ulea beyaso ne," padeak rajo.

Ijai o waktau si lok nikeak, gi telau basuak o madeak. Padeak kakok gi tuai ne, "Oy, lajau asuak ite nien, nikeak ngen rajo yo."

"Ite temotoa baé," padeak asuak ne nomor duai o. "Jano kelok ite bel o? Kakok lok jijai tukang mepuk pinḡan awei o,kan?"

Rajo yo nano bi temi'uk waktau neak serudung bel o. Ipe kulo si yo lok magea gi piset, si ba'es kulo. Gi duai o nano neluak ne ba tukang kesok. Areak em̄uk mei nelel ne, daging monok, jano kelok ne nelel ne.



**“Oy, rupanya adik kita betul yang jadi nikah dengan raja ini.”**

Kakok ne duai o agok jengik kemeliak asuak ne. Rajo dong alau moi negrai luyen, asuak ne yo nano belpas. Lahér adé anak ne semanei. Ules ne jengik kemeliak asuak ne, si gi ijai babu ne. Latok ne mukus anak ne. Nukus ne, si mepék neak lem petai latok ne monot neak bioa Ketawen. Monot, jijai bi uak monot. Temau magea tun tuai dong moi bioa. "Jano gén do o?" padeak ne. Petai sakut neak tebet dolo o. "Jano si keracok tun monot? Teak, umeak tun monot." Sudo o si mok, nem̄in ne petai. Sapei neak umai ne neak penan ne diem si mukok. Nukok, keneliak ne adé titik neak lem o dong tawai, semanei. Sudo o semanei o tenegén ne.

Gén ne Ujang. Meraso si coa gén anak, sayang nien si ngen Ujang yo. Bi lai titik yo si majea. Najea ne awei ca'o tun luyen majea anak ne nien.

Ijai o ite bélék moi cerito madeak penan kakok ne duai basuak o muang titik o nano. Latok ne gemitei ngen anak kuyuk, anak ne nien nonot ne. Ijai o, waktau rajo bélék, selawei duai nano, kakok ne o, madeak ngen rajo, "Oi, Rajo!" padeak ne. "Asuak ku belpas, anak ne kuyuk!"

Rajo tekjir. "Maso!" padeak ne. "Maso selawei menusyo banok kuyuk! Do o coa ite nam madeak ne!"

Padeak kakak beduai o, "Coa kémé perna temingā asuak yé. Teak ba kute ne neak lem kelok Tuhan?" padeak ne. "Asuak ite yo belpas kuyuk."

Rajo yo jengik. Panes cuma coa si nam madeak ne kerno anak ne nien, sako ne o. Do o ba mako si baik-baik midup kuyuk yo. Do o ba ra'yat dau yo mimok ne madeak, rajo o anak ne kuyuk." Coa ba rajo o demulai.

Sudo o an bi kean ne. Ijai waktau ngenyan ne dong kidék, ules ne o rajo alau igai. Alau igai, dong rajo coa dasei belepas igai ngenyan rajo yo. Anak ne é semanei igai. Sudo belepas semanei, kakok ne duai o menea awei bel o igai. Nepék ne lem petai, nukus ne baik-baik, kakok ne do tuai o tukang monot ne.

Coa an sudo o, rajo o bélék, si madeak asuak ne bi belpas igai. Madeak anak ne kucing. Taméak jengik baé rajo. "Maso!" padeak ne. "Bi duai kilai belpas, kuyuk, kucing anak ne."

Ijai o si coa as kemeliak ngenyan ne. Ngenyan ne madeak: "Do o coa ite nam madeak ne. Do o ba bagai te."

Si temi'uk kécék ngenyan ne awei o, o ba si sadar. Padeak ne, "Amen bagai ite awei o coa ite nam madeak." Senido ne ba kucing yo.

Bélék cerito anak gi nonot o nano, waktau em̄ei tuai o dong lok muang pegas moi bioa, kemeliak adé petai igai. Nemok ne, si em̄in, si mukok. Kemeliak adé cupik samo nien papea ne ngen gi tenemau ne dute bel o. Diyo ba si temgén gi nomor duai o Buyung. Tun duai yo temanang coa gén anak, ijai o riang nien si adé anak duai-duai.

O ba si majea tun duai yo. An-an bi lai kulo tun duai o, pacok kulo bepaneu. Pacok panau, pacok miling. Ati jako ne pacok miling si bi miling. Ati jako ne pacok bepaneu si bi bepaneu. Ite bélék moi magea cerito gi telau basuak o nano. Gi ngenyan rajo yo pogo kerényéng baé. Pogo mékér. Gén padeak, "Anok ku lahér kucing." Do o ba in̄ok ne yo sayang ngen kucing. Negong ne, senium ne. Mengīnoi si kemeliak kucing, ngen kuyuk yo.

Sudo o terjijai igai. Rajo o lalau igai, ngenyan ne dong kidék kulo. Sudo o waktau rajo lalau, belpas kulo ngenyan rajo. Anok ne yo selawei.

Kakok ne duai nano jan̄jing ngen asuak ne gi jijai ngenyan rajo. Belpas gi ketelau yo, cupik ne selawai, si menea igai awei bel o. Nuang ne igai cupik selawei o, nonot ne. Ijai waktau rajo bélék, bi genitei ne ngen kam̄ing.

Kerno iri ba kakok ne menea awei o nano. Maksud ne gemitei yo kerno si kemelebiak lok kulo ngen rajo. Kalau ngenyan ne o sena'ok ne, bé si lok gemitei ne, jijai ngen rajo. Padeak ne, "Aturan ne ite bel o jijai ngenyan rajo riang ite. Lajau asuak te, bagai ite tukang kesok. Si idup senang," padeak ne.

Sudo o waktau gemitei titik ngen kam̄ing nano, bélék rajo. Ijai rajo o madeak, "Do o cigai si baé," padeak ne.

Ra'yat dau neak di o pogoā mimok rajo. Banok kuyuk, banok kucing, banok kaṁing, padeak ne. Coa si serai ngen anak tun. Do o ba rajo o pékér, "Ami ngenyan ku yo iso si tun? Jano si benatang? Getai keselé yo ngenyan ku yo?"

Sudo o teko tenterarajo. "Si awei yo, Rajo. Ngenyan nu yo iso si tun. Ite mékét ne baé." Néket ne ngenyan ne o genatung neak iding dalen. Kékéa tangen néket. Api baé melitas semisit selawei o. Tingēa ba serwa ngen bajau neak awok. Daging ne senileak, nepék alat gi pelegiak ne atau cuko. Do o ba pogoā mengamuk terus, tip bilai awei o.



**Sudah jauh anak itu hanyut ke hilir, ditemukan oleh orang tua yang sedang pergi ke sungai.**

Bélék ite magea cerito moi titik selawei gi nonot o nano. Do tenemau tun tuai o nano. Waktau temau tun tuai o madeak, "Do o petai, adé do igai. Asai ku cigai luyen gén si isai ne tun," padeak ne. "Diyo adé ba penan titik asai ku. Tun jengik kemeliak anak ne. Teak si anak apang, teak jano ba," padeak ne. Sudo o si mok petai o, isai ne titik selawei. Kerno si coa adé anak, tenegén ne Upik. Ati jako ne si bi nam tawai bi tawai, ati jako nam paneu bi panau, samo ngen gi duai nano. Ba'es titik telau o, serai baé papea ne, cuma dikup selawei.

Adé gi ninik ne tun gerot dau ilmau, dau pakei yo. Ijai o najea ne Ujang ngen Buyung yo nano. Najea ne besilé $\bar{k}$ , misal ne, an $\bar{g}$ ar, meni $\bar{m}$ ak. Ati si en $\bar{g}$ ut dapet ninik ne majea ca'o nien ne si bi pacok meni $\bar{m}$ ak. Sesudo o si main pana. Main pana, ninik ne mepék ja $\bar{m}$ au neak das buluak, si midik ne, keno. Sesudo o si kemelebiak pacok ne duai basuak o. Latok ne meluk mi $\bar{n}$ as, sudo o nidik, keno. Kemelebiak pidik ne. Sudo ba kepacok ne yo kerno pakei ne.

Upik ne neak dasai, adé pakei kulo. Tun yo kemelebiak ba'es. Temi $\bar{g}$ ia kudo pacok si.

Adé uleak ninik ne yo bilei-bilai. Uleak ne yo beburau. Do o ba mot si majea Ujang ngen Buyung o beburau. Beburau awei yo ca'o ne meni<sup>̄</sup>mak. Sudo o waktau adé debilai ninik ne yo moi burau, si moi kulo. Tekeliak ne uso. Latok ne temi<sup>̄</sup>mak, keno, matei uso, ne<sup>̄</sup>min ne bélék. Do o ba tun lemo neak di, ninik sebebi ne duai magea si telau basuak, mem<sup>̄</sup>uk daging o. Senang nien si.

Jano uleak sebebi ne neak di o, si temanem areak bungai-bungai neraés ne neak keliling umeak ne. Si temanem kulo areak gén lapen o. Nelu'us ne ba'es-ba'es ne. Amen tun sapei ketén bungai o, ba'es. Tenanem ne areak buak-boak, ba'es kulo.

An bi kean ninik ne yo bi tuai kulo. Sudo o ninik ne yo matei. Matei ninik ne, tingā sebei ngen titik telau basuak o. Upik temanyé, "Jano adé pesen ninik ayok si matei?" Sebei, coa jenawap ne.

Sudo o Ujang ngen Buyung yo pogoā burau areak uso, areak kijang. Amen si burau uso, coa si em̄ot uso o, dong tidua dong tecok tenim̄ak ne. Padeak Buyung, si lok kemeliak kepacok ne duai basuak o. Padeak asuak ne, "Kakok," padeak ne, "do ipe senipet nu? Jano temim̄ak uso, jano temim̄ak kijang?" padeak asuak ne.

Padeak Ujang, "Uku lai, uku temim̄ak uso baé."

Padeak Buyung, "Amen ko temim̄ak uso diem ba neak piyo. Uku jemalang uso kuñei doloi, im̄o doloi o." Uso dong mengacap kejelas jano ne. Ujang temim̄ak keno matei uso o.

Sudo o si lok kemeliak gerot asuak ne. "Ko titik ko temim̄ak kijang," padeak Ujang. "Uku jemalang ne." Sudo o, kijang dong melitas kemelebiak gacang ne melilai. Buyung temim̄ak keno kulo. Areak daging coa si tekem̄uk igai.

Ijai o, uleak Upik neak dasai, kerjo ngen sebei. Jano uleak sebei ne? Misal ne o men̄ét bajau makei benang, menea areak tanḡuk. Najea sebei ne ca'o tun temakep ekan.

Ijai o waktau Ujang ngen Buyung bélék moi dasei, adé manat ninik ne ayok si matei. Si o teminḡa magea sebei ne. Padeak sebei ne ngen Ujang ngen Buyung, "Jemago asuak udi yo baik-baik! Pesen ninik udi." Padeak ne, "Jibeak sapei asuak udi o celako atau sileak sebaq asuak udi yo gi titik. Sunḡuak si titik yo mémang si yo pacok."

Manat ninik ne, dan kulo sebei udi, "Amen Ujang ngen Buyung lok burau, jibeak galok moi tebo luyen kuñei tebo penan ne galok majok. Sebak amen si moi tebo luyen bé adé celako atau dapet hal atau balak.

Sudo o, sebei ne coa nelel namén waktau Buyung ngen Ujang alau burau moi imo luyen.

~6~

Waktau burau moi imo luyen, temau si tun dong mesoa bes. Jijai tun dong mesoa bes o tekjir, padeak ne aweil yo magea tun duai yo, "Jano nesoa udi alau beak imo yo?"

"Kémé yo alau mesoa uso ngen kijang."

"Oy", padeak ne, "nak piyo dau nien kijang. Sebak korok yo awit tun burau kulo.

"Genyai si temimák uso, coa lok keno," padeak ne

Padeak Buyung, "Padeak kepacok uso piyo!"

"Nien," padeak tun mesoa bes o. Coa an waktau si madeak awei o melitas uso.

Tukang bes o temun̄juk dé'é. "Uso melitas! Tim̄ak bah!" padeak ne. Uso melitas temi'uk.

Waktau tukang bes o madeak, uso o tebedan.

Padeak Ujang, "Amen meluak uku temim̄ak uso yo, moi jalang ne! Keluak si melilai!" Alau tukang bes o jemalang uso o. Uso o dong melilai. Si melilai kelebiak jelas ne. Latok ne temim̄ak, keno, matei uso o. Ujang melei ngen tukang bes o. Ijai o tukang bes o nano cigai mesoa bes. Kelebiak riang dapet uso nano, si bélék. Bélék, tukang bes o nano em̄in moi sadei ne, penan Ujang ngen Buyung yo lahé. Si em̄in uso o, si majok tun sadei du'o medeu ca'o ite Ejang ba. Najok tun dau. Najok ne kulo rajo.

Amen rajo kemeliak uso o, tekjir si. "Jano?" padeak ne. "Nak ipe udi mok uso o? Kémé baé burau uso coa dapet," padeak ne.

"Uso yo iso si dapet ku idup."

"Nemok nu?" padeak rajo! "Ko melei tun mēmuk bukei uso?" Awei o, lok nengiak ne semanei tukang bes yo.

Jawap ne, "Coa si uku munuak ne. Adé tun duai burau uso. Titik kelebiak nien ba'es ne. Bi lok serai ngen papea nu kulo," padeak ne awei o.

Sudo o padeak rajo, "Amen awei o, maro bah! Tengén titik tobo o galok beburau?" padeak ne.

"Asai ku kulo tip bilai si beburau mīni, si awit buliak."

Sudo o penyiep ba rajo o ngen tentera ne lok alau beburau. Tentera ne moi. Kaben yo nano awei tun lok alau mañun perang, jano lok mañun mesoa uso nien.

Si alau moi beak imo. Waktau moi beak imo temau kulo ngen titik duai é, ngen anak ne yo. Si coa namen.

"Jano uleak udi yo?" padeak rajo.

"Mesoa uso," padeak Ujang.

"Kémé yo lok mesoa uso kulo neak piyo. Lok berpok ite mesoa uso," padeak rajo.

"Amen lok mesoa uso," padeak tukang bes o—tukang bes o moi kulo temunjuk penan ne—"nak di gi adé."

Padeak Ujang, "Maro ba ite temimāmak ne amen gi adé." Decang sudo o tekeliak rajo uso. Rajo o kemeliak uso. Padeak ne, "Dé'é uso a! Moi ba timāmak ne!"

Buyung madeak, "Amen meluak kémé temim̄ak ne, jibeak temim̄ak dong tidua. Tim̄ak ba rajo." Rajo yo temim̄ak uso o, coa keno.

Sudo o padeak Buyung nano, "Ai, jibeak kumu moi burau temotoa kémé amen barat yo. Keliak ca'o kémé amen lok temim̄ak uso," padeak ne. Decang sudo si madeak, adé kulo uso melitas.

Padeak rajo, "Dé'é uso! Tim̄ak bah!

"Amen meluak uku temim̄ak," padeak Buyung, "kusir keluak si melilai." Moi rajo jemalang. Uso dong melilai kelebiak nien jelas ne. Latok Buyung o temim̄ak ne, keno. Matei uso o. Rajo o sapei cengang. Cengang, melitas kulo kacéa dong melitas kemelebiak jelas ne. Latok Ujang temim̄ak kuñei belakang matei. Sapei rajo o sélég.

Sélég rajo, anak buak rajo o bi mengiak kulo. "Udi tun ipe?" tenanyé ne.

"Kémé diem beak im̄o. Diyo ba uleak kémé," padeak Ujang.

Padeak tentera rajo o, "Udi lanḡuk nien diem beak im̄o. Kémé diem sadai, coa si awei udi."

"Coa kémé lanḡuk, do o ca'o kémé," padeak Ujang.

Padeak kulo tentera rajo o, "Amen udi lok nien sekujai ite, maro ba ite sekujai uyo!"

"Sekujai jano kelok udi?" padeak Ujang. "Amen udi lok majok kémé betan̄ing, maro ba ite temim̄ak buak lémeu nepék neak ujung buluak," padeak Ujang awei o .

"Maro!" padeak rajo. Coa rajo namen anak ne gi betan̄ing yo.

Sudo o, Ujang madeak tim̄mak geak rajo dute. Tenim̄mak rajo, coa keno. Sudo rajo, si meluak anak buak ne temim̄mak kulo. "Tulung tim̄mak geak udi," padeak Ujang. Bi adé biak telau puluak soa anak pana tenim̄mak ne, coa adé keno.

Sudo o rajo madeak, "Sapei gilia udi. Tim̄mak ba geak udi!" padeak ne.

Ujang o temim̄mak keno. Pelai léméu o.


Padeak Ujang, "Udi lanḡuk. Lok majok kémé betu'uak temim̄mak léméu yo baé, coa udi keno. Amen udi lok kemeliak kepacok te, awei yo!" padeak Ujang. Si mok buak léméu, si meluk, Buyung temim̄mak pelai kulo léméu o. Tobo duai yo nano o najea ninik ne sok kūnei titik. Tenawai ne baé tun majok sekujai.

Ijai rajo yo panes atei ne. Rajo yo bélék moi sadei ne. Ayok si bélék, si madeak ngen tun duai yo, "Nak ipe udi diem?"

"Kémé diem neak beak īmo."

Padeak rajo, "Sudo yo kémé alau meto moi beak īmo, penan udi."

"Buliak baé!" padeak Ujang. Sudo o si alau. Ujang ngen Buyung yo bélék moi penan sebei ne. Rajo o bélék kulo moi sadei ne.



**Belum anak-anak itu diajarkan menémbak sebenarnya, mereka sudah bisa menémbak.**

Waktau si bélék moi penan sebei ne o, sebei ne dong sakit. Ninik ne o madeak ngen si. "Uyo cigai an igai idup ku yo. Udi yo iso si anak ku, iso," padeak ne. "Udi dapet ku monot telau yo. Uku madeak gi nien ne. Udi gi adé iñok ngen Bak."

Tekejir titik telau basuak o. Si o beñok magea sebei ne. Padeak sebei ne o, "Udi jibeak beñok magea uku," nadeak ne. "Udi besebei baé." Si mengiñoi temi'uk cerito o. Si yo iso si anak sebei ne. Si diem ngen sebei.

Adé pesen ne. Padeak sebei, "Udi duai semanei yo arus jemago asuak gi selawei yo baik-baik, jibeak sapei adé celako. Jano kelok asuak ne o jibeak coa nemok, jibeak coa nelei," padeak ne.

"Au," padeak Ujang awei o.

"Jijai ba dé'é, Sebei," padeak Buyung. Ijai o titik telau yo nano kelebiak ibo ne temi'uk sa'ei pesen ninik ne. Sebei ne o meninga. Si kemubua neak lé'ét ji'et ninik ne. Sudo kenubua nelé'ét ninik ne, titik telau yo pogoā ngiñoi.

~8~

An sudo o, Ujang magea Buyung alau moi beburau. Ijai o si bélék, Upik madeak.

"Uku adé kelok magea Kakok."

"Jano?" padeak Ujang ngen Buyung.

"Uku adé pesen sebei," padeak Upik. "Sebei meluak mok bioa pacua o kuñei bioa rakso, meluak mok bungai pacok merayu, meluak mok burung pacok miling. Penan ne neak Tebo Sam neak doloī o."

Ujang magea Buyung madeak, "Ijai ba amen si madeak awei yo."

Si namen, jano kelok asuak ne o, sebei ne madeak, jibeak coa mok awei o. Kinget ne, si mok kudo ne. Si mepék neak denam poñok ne lajau madeak ngen Upik. "Ko diem ba neak poñok yo baik-baik. Jibeak ko lalau. Gén kem̄uk nu cukup. Kean kémé yo lalau. Ko arus kemeliak taño kémé. Amen kémé dapet kelok sebei atau kelok Upik, mujua ba. Amen coa, coa ite nam madeak ne," padeak Ujang awei o.

Ayok si lalau o si menea taño. Adé gi Ujang mepék pinḡan das lémén. Nepék ne baik-baik. "Amen pinḡan yo pecuak taño uku matei," padeak ne awei o.

Sudo o Buyung gematung piseu neak das pagau. Padeak ne, "Amen piseu ku yo bé cacok daleak moi pinḡan kakok, taño ne uku matei kulo."

Sudo o alau ba si duai basuak. Coa si lalau moi do penan. Luyen-luyen. Misal ne dalen yo becabang duai. Ujang lalau lekok yo, Buyung lalau lekok di.

Wakta Ujang o lalau lekok yo, sapei si neak sipang. Si temau tun tuai. Tun tuai yo madeak, "Amen ko lok moi mīni, jano keneliak nu neak dalen, jibeak munuak ne. Jibeak ko demulai ne. Moi ba, ko lalau terus," pesen tun tuai o nano.

"Ijai ba amen awei o," padeak ne. Coa an sudo o, neak dalen keneliak ne imeu, keneliak ne siamang, keneliak ne uso melitas, keneliak ne kelwang kelai umeak mengekik iding ti'uk ne. Si rényéng kerno temi'uk padeak tun tuai neak sipang o, nano—"Jano keneliak jibeak temim̄ak ... amen ko temim̄ak udi adé bahayo"—terus ba si lalau.

Kelebiak dau gi gemurég si neak dalen. Si lok temim̄ak benatang. Waktau si lok temim̄ak imeu o, ijai ba si butau. Matei. Ujang jijai ba si butau.

Tinḡea ba Buyung. Terus mesoa, terus mesoa, limeu dalen. An-an temau dalen becabang duai, penan Ujang tanyé nano, temau magea tun tuai nano. Padeak ne, "Getai ko neak piyo?"

"Uku limau dalen ne. Uyo uku lok temotoa dalen kakok ku baé," padeak ne.

Do o ba tun tuai madeak, "Jano keneliak nu neak dalen, jibeak ko gemurék."

"Ijai ba," padeak ne. Si terus bekudo. Bekudo, dau ba mecem temau ne. Sudo o si kemeliak burung. Burung o mengekik. Sewaro ne pogo besa'ei. Buyung o lok temim̄ak. Ijai butau kulo Buyung yo ngen kudo ne.

Bélék ite ngen Upik gi tingēa su'ang neak poñok nano. Si kemeliak taño gi Ujang, pingān ne pecoak. "Bi matei kakok ku." Kemeliak gi Buyung, piseu ne bi cacok daleak moi pingān pecoak. "Ai!" padeak ne, "Amen awei yo kakok ku matei kute." Upik menyiep areak alat-alat ne. Areak juadeak neḡin ne kulo. Si mok kudo. Ayok si lalau, Upik moi magea ji'et ninik sebei ne. Padeak ne awei yo, "Ninik sebei, " padeak ne. "Uku yo lalau mesoa kakok ku. Matei kute. Uku lok mesoa bukei ne. Amen si idup kinoi ite bé, mujua," padeak ne. "Amen si matei bé cigai ite nam madeak ne.

Sudo o Upik temi'uk sa'ei o kuñei ji'et ninik sebei ne. "Moi ba. Uku meluak ko lalau."

Lajau ba uñua. Upik lalau semsung lat kakok ne. Si temau ngen tun tuai neak sipang penan Ujang ngen Buyung betanyé. Padeak ne, "Lok moi ipe anguk nu, Elen?"

Padeak Upik, "Uku lok lalau mesoa kakok ku."

"Totoa dalen yo, dalen penan nelitas kakok nu yo bel o. Tapi ada jañjai didik," padeak ne. "Jano baé benatang gemurék ko, ko jibeak munuak ne," padeak ne.

"Ijai," padeak ne awei o. Ayok si lalau, Upik mepék kapes neak ti'uk ne mako coa dau gén teni'uk ne. Si alau bekudo. neak dalen macem-macem penemau ne, cuma coa si temi'uk. Coa an keneliak ne kakok gi beduai o bejjai butau.

Ngiñoi si kemeliak kakok duai o. Waktau si ngiñoi, sapei burung. Burung yo pacok miling.

"Ko lok lalau moi ipe, Gadis?" tenenai burung.

Upik o cengang. "Uku teko miñai lok moi magea kakok ku," padeak ne.

Padeak burung o, "Nien, kakok nu yo tun gerot. Coa lok temebeak kuñau. Sifet ne o mem̄in sifet tun gerot," padeak ne. "Uyo adé ca'o ne. Kemok sarat. Mok sergayau ngen bioa. Bioa o nuñok ngen bioa belas didik, necik moi butau o. Do o ba sarat ne," padeak burung o. Upik mok bioa gi padeak burung o nano. Si mecik kékéa tangen tun jijai butau nano. Ujang ngen Buyung idup igai. Kudo nano gi jijai butau nano bélék idup igai.

Ayok si lok alau, burung teko. Padeak ne magea Upik, "Adé pesen?"

Padeak semulen o, "Adé nien. Lok burung pacok miling, bungai pacok menyanyi ngen bioa pacua kuñei bioa rakso."

Padeak burung o, "Kemok neak Tebo Sam o. Coa si uak kuñei yo."

Lajau dekuat telau basuak o ngen burung pacok miling o. Moi si mok ne. Waktau si mem̄in bélék, bungai negong ne yo menyanyi. Gi burung o miling, bi jijai kuat ne, milau tobo o bélék. Waktau mem̄in, bioa pacua nano, cemimēi awok ne.

Tobo yo bélék moi pōnok ne. Bioa macua kūnei rakso nano, cenu'ei ne moi iding ji'et ninik ne duai o. Adé gi bungai pacok menyanyi o nano, tenanem ne neak latet gi keno angin-angin. Adé burung pacok miling yo nano nepas ne baé. Jano padeak tun tenotoa ne.

Ijai o bi senang si kemeliak awei o. Waktau si gi titik bel o dau temanem areak buak-boak, areak jam̄au, areak manḡus neak latet o. Bi buak kute tanem-tanem ne nano. Manḡus ne uyo dong mesok.



**Kami mencari burung yang dapat berbicara, bunga yang bisa bernyanyi, dan air mancur dari air raksa.**

Ujang ngen Buyung lalau moi meto. Waktau si lalau sapei ba neak penan sadei rajo o. Sapei neak di o, si lok majok rajo beburau, lok meñes rajo o alau moi burau. Rajo yo lok kulo najok alau moi burau. Si tujau nien.

Ayok si lalau, tobo yo kemeliak adé selawei tepékét. Padeak Buyung, "Gentai selawei o gi nogoa udi semisit?" (Coa si namen do o inok ne, tun duai o.) Selawei o tecengang kemeliak tun duai. Cigai si meraso tun semisit awok ne, mepék areak cuko. Cigai si meraso pelegiak kemeliak tun duai o, si asai kemeliak anak ne. Mémang anak ne nien, cuman si coa namen. Rajo coa demulai selawei tepékét o. Rajo yo bangso temi'uk padeak anak buak ne. Tobo yo lajau alau. Selawei tepékét nano pogoā ngiñoi kemeliak titik duai o.

Rajo yo burau coa si awei lok nien. "Amen awei yo," padeak Ujang, "meto baé ngen kémé." Sapei neak poñok, teni'uk raji rami sa'ei tun menyanyi. Bungai menyanyi neak penan gi keno angin-angin. Keneliak ne bioa macua miñas. Mémang bioa macua rakso. Burung becénéu miling. Do o kulo, kea umeak ne licin awei bioa ne, kerno kegerot ilmau ninik ne bel o.

Si kemeliak awei o, padeak raji, "Padeak keba'es penan udi yo! Areak bungai dau, kemelebiak ba'es, buak-buak dau." Raji yo tecengang. Burung o medeu raji moi dasei. Ati raji moi dasai, si semesing serwea ne.

"Gen tai semesing serwea, Raji? Coa si bioa piyé. Diyo ba penan te," padeak Upik o.

Rajo tecengang kemeliak awei o. Rajo o temot. Rajo temot samo bepékér: "Diyo ba baik nebut ijai penan negrai te. Amen ite temuan penan yo, coa si an̄gen keba'es ne. Tekujat penan te."

Anok buak ne nano coa moi dasei. Pogoā ēmuk buak. Coa an sudo o lok bélék rajo yo. Si madeak ngen tun telau basuak o, "Uku bélék," padeak rajo o. Ijai bélék kute rajo ngen tentara ne.

Coa an sudo o rajo teko igai mānun tobo yo perang. Lok mebut talang tun telau basuak yo. Sapei neak di o, anak buak ne coa adé nyut perang kemeliak buak dau o. Tentara ne pogoā ēmuk buak. Cuma burung o namen niat atei rajo o.

"Si lok merang ite," padeak ne. "Siap ba udi!"

Rajo yo nano lok moi dasei temim̄ak tun telau basuak o. Si kemeliak anak buak ne mogoa em̄uk buak manḡus. Seniak kulo rajo lajau buyé lajau em̄uk buak kulo bekenék pun buak-buak o, memuk sapei kenyang.

Rajo yo tu'un gacang-gacang, bi kenyang. Anak buak ne o bi lok perang igai. Sudo o burung o madeak, "Uku namen maksut udi teko min̄ai. Coa udi lok baik, coa. Udi lok kidék, lok merang tun telau basuak yo. Kerang bah!" padeak ne. Tim̄ak ba kémé," padeak burung o!"

Kemeliak awei yo, rajo yo panes. Latok ne temim̄ak. Titik telau o dong belé'ét neak di. Burung nano diem neak das atep, nogoa rajo temim̄ak. Coa adé keno. Tobo yo dau pakei ne.

Tenawai ne baé. "Amen udi lok mebut talang kémé, coa udi nam," padeak ne. Rajo yo sapei sélég ngakau. Rajo o bélék, coa adé penan mepék papea sélég ne.

~10~

Waktau rajo bélék, burung madeak ngen tun telau basuak. "Pesen ninik udi bel o waktau udi gi titik," padeak ne. "Amen udi lok namen in̄ok ngen Bak udi, tapi diyo bahayo. Udi arus moi sadei luyen, neak di adé tun kidék gi lok munuak udi. Do o pesen ninik udi bel o," padeak burung. "Amen udi lok moi mīni, udi arus kemetén kegerot udi." Ninik ne madeak kulo: "Uku melei tobo yo lemau gi be'et ne. Uku meluak si mesoa bungai pacok merayu, sudo o ngen bioa macua kūnei bioa rakso.

"Uku burung gi pacak miling. Uku kulo neluak ninik temulung udi. Udi arus gerot ngen binai. Udi yo arus dapet!. O ba pesen ninik ngen uku bel o. Tobo yo arus dapet!" O ba pesen ninik ngen uku belo o," nadeak burung magea tun telau basuak yo.

Sudo o pesen ninik ngen burung yo: "Amen telau basuak o kemerjo jano baé tulung-menulung, ngen dapet kute gi padeak ku nano, uku meluak ko, burung, kemetén bukau yo. Bukau yo bisai kute cerito asal-usul udi, iñok ngen Bak gi nien ne."

"Diyo," padeak burung o ngen tun telau basuak o. "Baco bukau yo, mako udi namen api udi gi sebenea ne."

Lem bukau yo adé petun̄juk moi sadei rajo. Nebaco ne bahwa rajo o tiak ne.

Ujang, Buyung dan Upik lalau moi magea moi sadei rajo. Alau moi mīni o, melitas penan tun selawei gi nékét nano. Keneliak ne selawei gi nékét o. Si tinget, asai ne adé neak lem bukau ninik ne nano. Sudo o si betanyé ngen tun neak di o. Padeak Ujang, "Api si gén selawei tepékét o?" Tun madeak gén tun genatung o. Madeak gén ne ngenyan rajo. Jijai, gi genatung o īnok ne.

Sudo o, Ujang meluak Upik jemago īnok ne. Ujang ngen Buyung alau magea rajo. "Kumu Bak!" padeak ne ngen rajo.

Waktau si madeak 'Bak' ngen rajo, rajo tekjir. "Uleak kulo ko bebak magea uku?"

Padeak Ujang, "Awei yo, Rajo," padeak ne. "Diyo ba bukau ninik ku. Kémé lahér, gi titik bel o, ninik midup kémé," padeak ne. "Si temau kémé telau basuak yo neak bioa cenḡilung neak bioa Ketawen.

Rajo mukok bukau o nano. Tinget rajo. "Diyo anak ku," padeak ne. Tinget si neak lem atei ne, diyo ulea kakok ngenyan ne. Si megep anak ne yo nano. Ngenyan ne ngen anak perpuan ne gi neak dalen. Īnok ne jenago Upik ngen baik. Cigai si meraso silea ne igai. Betakup igai kemeliak anak ne. Si ngīnoi. Ngīnoi, tiak ne moi temetok tilai pékét ĩnok ne. Padeak ne, "Coa si saleak nu. Diyo ba anak ite nien."

Ujang, Buyung dan Upik temu'un ĩnok ne gi genatung nano.

Coa si ulea ku diyo," padeak ĩnok ne.



**Raja memeluk anaknya berdua ini. Anak perempuan dan isterinya masih di jalan.**

"Coa si ne," padeak rajo. "Diyo adé ba ulea wok nu duai o," padeak rajo. Diyo ba si segep, lemo banok, samo ngiñoi.

Ngiñoi sapei pa'eu selawei duai banok o nano. Tentera o madeak, "Diyo ulea kakok ngenyan kumu, gi duai basuak o nano. Kémé munuak ne baé." Waktau madeak lok munuak o nano, si mékét selawei duai o. Latok tentera rajo o munuak. Tapi anak telau basuak lok madeak "Jibeak munuak!" jano, bi putus kagen tun duai o. Matei kakok ne duai o bales ulea kidék ne nano. Tentera rajo déwék munuak ne.

Ijai sapei yo ba cerito Telau Basuak yo.

*Temanem poi bekebuak poi,  
Temanem lalang bekebuak apai.*



**BACAAN SEBAGAI PETUALANGAN**